



KOMUNIKADU IMPRENSA

Análize Intelijénsia no Pozisaun Públika kona-ba Padraun Violénsia no Impunidade ne'ebé Envolve Ofisiál Seguransa no Intelijénsia iha Covalima

Díli, 8 Setembru 2026

ONG HABADA - (Hali Ba Dame), organizasaun ida ne'ebé dedika ba promove pás, justisa no akuntabilidade instituisaun seguransa nian iha Timor-Leste, fó sai deklarasaun ne'e hafoin analiza kle'an kona-ba faktu sira ne'ebé fó sai ona ba públiku relasiona ho insidente grave rua ne'ebé akontese iha fatin ne'ebé hanesan, Aldeia Wetaba, Suku Beiseuk, Postu Administrativu Tilomar, Munisípiu Covalima iha tinan rua ikus ne'e (2024-2026).

Kazu dahuluk, iha loron 1 fulan-Maiu tinan 2024, membru Servisu Nasional Intelijénsia Estratéjika (SNIE) tiru kanek mane ida ho idade 24 iha Aldeia Wetaba, Suku Beiseuk. Kazu daruak, iha loron 24 fulan-Juñu tinan 2026, kazu omisídiu ho inisial TC. Liu tiha fulan rua-resin, iha loron 31 fulan-Agostu tinan 2026 arguidu na'in haat hetan kapturasaun no detensaun - ne'ebé envolve membru na'in tolu husi SNIE no membru ida husi Unidade Patrullamentu Fronteira (UPF) - iha ne'ebé agora daudaun iha hela prizaun preventiva tuir desizaun husi Tribunál Judisial Primeira Instáncia Suai nian (TJPIS).

HABADA fiar katak epizódium rua ne'e, akontese iha área jeográfika ne'ebé hanesan no envolve elementu sira husi instituisaun ne'ebé hanesan, labele trata hanesan eventu izoladu ida. Sira presiza análise ida kona-ba padraun sira, risku institusionál, no défise sira responsabilizasaun nian.

1. Kazu tinan 2024 nian: violénsia armada no silénsiu prosesuál

Tuir kronolojia ne'ebé maka HABADA halibur no konfirma husi fonte lokál oioin, iha loron 1 fulan-Maiu tinan 2024, maizumenus tuku 10:20 kalan, karreta Hilux metan ida ne'ebé laiha xapa matríkula sirkula iha área ne'e ho feto ida iha karreta laran. Bainhira comunidade sira tenta atu atende situasaun ne'e, kondutór - ne'ebé identifika nu'udar Sub-Tenente GSC, membru F-FDTL ida ne'ebé destaka iha SNIE no servisu iha postu fronteira Covalima - tiru hasoru comunidade sira no joven ida ho idade 24 hetan kanek grave, ne'ebé presiza halo transferénsia husi Ospital Suai ba Hospital Nasional Guido Valadares iha Díli. Iha mós asaltu fíziku hasoru ema ho defisiénte ida.

Tinan rua liu tiha ona, no prosesu ne'e sei iha hela "nonok nia laran" - laiha klareza públika kona-ba estadu investigasaun nian, akuzasaun formál, medida dixinlinár interna, ka desizaun Ministériu Públiku

nian. Silénsiu ida-ne'e nu'udar indikadór ida risku nian. Bainhira intelijénsia ka ajente defeza ida uza kilat hasoru ema sivíl iha kontestu la operasionál no sistema justisa la konsege prodús resposta ne'ebé klaru, ida-ne'e kria presedente impunidade ne'ebé hafraku konfiansa comunidade fronteira nian ba instituisaun Estadu nian.

2. Kazu tinan 2026: omisídiu, la hetan mate-isin, no prizaun preventiva

Iha loron 24 fulan-Juñu tinan 2026, vitima TC, fila husi Indonézia, lakon iha Mota Masin, Aldeia Wetaba, Postu Administrativu Tilomar. Iha inisiu, informasaun sirkula - amplifika iha média sosiál - katak nia hetan ataka husi lafaek. Investigasaun husi Polisia Nasional Timor-Leste (PNTL), liuhusi Diresaun Servisu Investigasaun Kriminál (DSIK) no Komandu Munisípiu Covalima, konklui oin seluk ka forma ne'ebé diferente.

Iha loron 31 fulan-Agostu tinan 2026, DSIK ezekuta mandadu kapturasaun no detensaun ne'ebé fó sai husi TJPIIS no kaer suspeitu na'in haat: membru na'in tolu husi SNIE no membru ida husi UPF. Iha loron 2 no 3 fulan-Setembru tinan 2026, hafoin primeiru interrogatóriu, tribunál haruka aplika medida koasaun prizaun preventiva. Arguidu sira transfere ona ba Estabelesimentu Prizional Suai. Kazu ne'e rejista ho NUK 0016/26-CVSUI.

Diretor DSIK Superintendente-Xefe João Belo konfirma públikamente katak investigasaun continua la'o hela, partikularmente kona-ba lokalizasaun vitima nia mate-isin, ne'ebé to'o agora seidak hetan. Nia mós subliña katak kualkér prosesu dixiplinár no kriminál hasoru membru sira PNTL nian (ka, ho estensaun, forsa sira seluk) maka responsabilidade husi individu no la'ós husi instituisaun.

3. Análize ba padraun sira no risku institusionál

Husi perspetiva HABADA nian, destaka elementu preokupante haat:

Primeiru – konsentrasaun jeográfika no institusionál. Insidente rua ne'e akontese iha aldeia ne'ebé hanesan (Wetaba) no envolve ajente husi instituisaun ne'ebé hanesan (SNIE). SNIE nu'udar instituisaun intelijénsia ho mandatu halibur informasaun no proteje interese nasional, la'ós atu uza forsa letál iha kontestu patrullamentu ka konfrontu ho ema sivíl. Repetisaun epizódiu sira iha korredór fronteira hatudu kona-ba fallansu supervizaun nian ka kultura operasionál ida ne'ebé tolera uza forsa ne'ebé maka'as liu.

Segundu – asimetria transparénsia nian. Iha kazu 2024, silénsiu prosesuál kuaze totál. Iha kazu 2026, resposta judisiál relativamente lalais (detensaun preventiva iha menus fulan tolu hafoin dezaparesimentu). Diferensa iha tratamentu ida-ne'e alimenta persesaun seletividade nian. Bainhira comunidade observa katak tiru ida ho kanek todan la hetan resposta no dezaparesimentu ida ho suspeitu sira ne'ebé identifikadu lalais, konfiansa iha sistema justisa sai frajil.

Terseiru – la hetan mate isin no narrativa inisiál. Sirkulasaun informasaun dahuluk katak vitima hetan atake husi lafaek, ne'ebé ikusmai investigasaun polisia nian hatudu oin seluk, ilustra oinsá narrativa ofisiál ka semi-ofisiál sira bele uza – ho konxiénte ka la konxiénte – hodi desvia atensaun husi responsabilidade suspeitu sira nian ba kazu ne'e. Iha kontestu fronteira nian, iha ne'ebé asesu ba informasaun limitadu no tauk ba represaun sira, narrativa inisiál sira-ne'e iha pezu ne'ebé la proporsionál.

Kuartu – sobrepozisaun kona-ba estrutura seguransa sira. Prezensa simultánea SNIE, UPF-PNTL no

elementu sira F-FDTL nian iha espasu operasionál hanesan kria zona cinzentas sira komandu no kontrolu nian. Lahó mekanizmu klaru ba responsabilizasaun kruzada, risku abuzu autoridade aumenta.

4. Pozisaun no Ezijénsia sira HABADA nian

HABADA la iha intensaun atu troka autoridade judisiál sira ka hodi fó julgamentu. Ami rekoñese servisu DSIK-PNTL, Ministériu Públiku Suai, no TJPS iha kazu 2026 nian. Maibé, nu'udar organizaun sosiedade sivil, HABADA iha devér atu levanta kestaun sira ne'ebé interese públiku nian:

- Prosesu sira relasiona ho kazu tiru iha loron 1 fulan-Maiu tinan 2024 tenke loke fali ka, pelumenus, sira nia estatutu atuál tenke fó sai ba públiku, hodi indika ho klaru pasu sira ne'ebé foti ona no razaun sira karik halo ona arkivamentu.
- Investigasaun kona-ba omisídiu TC nian tenke la'o ho independente kompletu, inklui lokalizasaun mate-isin nian no posivel identifikasaun ba autór sira seluk ka esforsu no presaun sira ne'ebé tenta atu taka kazu ne'e.
- Estrutura dixiplinár internu sira SNIE, F-FDTL, no UPF-PNTL nian tenke hatudu, verifikavelmente, katak sira aplika hela sansaun proporsionál sira no katak sira la proteje ajente sira ho baze estatutu institusionál.
- Parlamentu Nasional, Governu no Provedoria Direitus Humanus no Justisa (PDHJ) tenke hancin atu kria mekanizmu independente ida hodi tau matan ba atividade inteliyénsia no forsa fronteira nian, ho kbiit atu investiga alegasaun kona-ba uza forsa ne'ebé demaziadu no violasaun direitus umanus.
- Komunidade sira Tilomar no Covalima tomak tenke hetan atualizasaun klaru no regular kona-ba lala'ok prosesu nian, atu nune'e bele hamenus rumoris no erozaun konfiansa iha instituisaun Estadu nian.

Ikus liu, HABADA salenta katak pás la'ós harii de'it iha auzénsia konfliktu armadu nian. Ida-ne'e harii iha serteza katak laiha ajente estadu nian – bele inteliyénsia, militar, ka polisia – maka iha fali lei nia leten. Bainhira rejista iha área jeográfika ne'ebé hanesan, iha tinan rua ikus ne'e, tiru kanek grave ida no omisídiu ida ho suspeitu sira ne'ebé pertense ba instituisaun ne'ebé hanesan (SNIE), silénsiu ka resposta seletivu la'ós sai hanesan opsaun ne'ebé aseitavel. Nune'e, HABADA sei kontinua akompaña prosesu sira-ne'e, halibur informasaun husi fonte oioin no komunitáriu sira, no presiona, iha limite legalidade no étika nian, atu justisa sai efetivu, transparente, no hanesan ba ema hotu.

Informasaun kle'an liutan halo favor kontaktu:

Abel Amaral

Diretor Ezekutivu

Mobile: +670 7745 4324

Email: abelamaral75@gmail.com

Website: www.habada.org